

Universitäts- und Landesbibliothek Tirol

Franz Schwegger's Chronik der Stadt Hall

Schwegger, Franz

Innsbruck, 1867

Prunst

darunter pey 1400 knecht, ausserhalb des tross. Ir öbrister ge- 1532
nant conte Philippo Torniello.

Am erchtag darnach sein sy verruckt zue fuess auf dem
landt gen Kopfstain zue und alda auf das wasser gessen und in
Oesterreich gfare.

7. Durchzug.

Am freytag den 20. Septembris ist mer hie zu Hall an die
lendt ankumen wälsch kriegsvolek 12 fänndl, darunder der rechtn
soldatn 2400 knecht, ausserhalb ires grossen tross. Der öbrist
dises hauffen genant Fabricius Marmaldus. Nachvolgetten sambst-
tag über landt auff Khuefstain und von dannen aufs wasser hin-
weg gefarn in Oesterreich.

8. Durchzug.

Am pfnztag den 25. Septembris seind mer 2 hauffen wälsch
kriegsvolek nachainander hieher an die pemelt lendt khumen. Ped
hauffn haben ghabt 21 fänndl, darunder des rechtn kriegsvolek
pey 4000 knecht. Die 2 öbristen genandt signor Pirro de Columna,
der ander signor Columella de Columna. Dise 2 hauffn seind
auf dem wasser hinweg gefarn in Oesterreich, der khayserlichen
majestät zue.

Öbrister hauptman kayserlicher majestät.

In disem monat ist auch zue Hall ankumen der herr Anthoni
de Löfa, kay. mjt. öbrister hauptman, auch ditzmal stathalter in
Maylandt. Ist ungefärlichen mit 40 perschonon zue ross khumen.
Sein perschon hat man in ainer senfften gefürt, dan er aller
contract ist gwesen an seinen glidern. Hat auch pey 20 teütsch
trabantn ghabt. Nachmals auff dem Innstram der kays. mjt. in
Oesterreich zue gfare.

Prunst.

In disem 32. jar, im eingeenden monat Juli, umb die 10 ur
in der nacht ist zue Hall an der Scheffgassen ain hauss verprun-
nen aus verwarlosung der ingheusn. Hat zuegehört Vitaln Aman.
Man hat ditzmal trostlichen und dapfer gewert, damit den an-
stossetn heüssern nit sonderlichen geschehen ist.

Mer ist in disem monat Septembris durch der Wälschn tross
anzinnt und verprennt worden ain hauss und stadl enthalben der
innpruggn.